

O`zbekiston Respublikasi Prezidentining 2017 yil 8 noyabrdagi PQ-3379-sonli «Energiya resurslaridan oqilona foydalanishni ta`minlash chora-tadbirlari to`g`risida»gi qarori haqida

Elektr va gaz ta`minoti tizimini yanada takomillashtirish, bozor mexanizmlarini keng joriy qilish orqali energiya resurslaridan oqilona foydalanishni ta`minlash, shuningdek, mazkur sohada ko`rsatilayotgan xizmatlar sifatini yaxshilash maqsadida Qoraqalpog`iston Respublikasi Vazirlar Kengashi qaror qiladi:

1. O`zbekiston Respublikasi Prezidentining 2017 yil 8 noyabrdagi PQ-3379-sonli «Energiya resurslaridan oqilona foydalanishni ta`minlash chora-tadbirlari to`g`risida»gi qarori ijro uchun rahbarlikka olinsin.
2. O`zbekiston Respublikasi Prezidentining yuqorida qayd etilgan qarori asosida:

a) «O`zdavenergonazorat» DI, «O`zdavneftgazinspektsiya» DI, «O`ztransgaz» AJ va «O`zbekenergo» AJning faoliyati qoniqarsiz deb topilganligi;

b) O`zbekiston Respublikasi Moliya vazirligi, «O`zbekenergo» AJ, «O`ztransgaz» AJ, «O`zdavenergonazorat» DI, «O`zdavneftgazinspektsiya» DI va «Energiya tejash milliy kompaniyasi» AJning quyidagi tartibni belgilash haqidagi takliflari qabul qilinganligi:

b.1) 2018 yil 1 yanvardan:

ilovaga muvofiq ro`yxat bo`yicha mahsulot ishlab chiqaruvchi va ayrim xizmatlar ko`rsatuvchi iste`molchilar elektr energiyasi (750 kVAgacha bo`lgan quvvatga ulangan) va tabiiy gaz uchun to`lovlarni O`zbekiston Respublikasi Vazirlar Mahkamasining qarorlari bilan o`rnatiladigan o`sb boruvchi koeffitsientlar va tariflarga muvofiq amalga oshirishi;

750 kVA va undan yuqori bo`lgan quvvatga ulangan (byudjet tashkilotlari, fermer ho`jaliklari va suv iste`molchilari uyushmalarining nasos stantsiyalari, shuningdek, Davlat byudjetidan moliyalashtiriladigan nasos stantsiyalari bundan mustasno) iste`molchilar elektr energiyasi uchun hisob-kitoblarni ikkinchi guruh tariflar bo`yicha to`lovlarni amalga oshiradigan yuridik shaxslar uchun tarif miqdorida belgilanadigan sutka vaqtlarining tabaqalashtirilgan tarifi bo`yicha amalga oshirishi;

bunda yagona elektr energetika tizimining eng katta yuklamali soatlarida (tig`iz payt - belgilangan tartibda o`rnatilgan ertalabki va kechki «eng katta miqdor») foydalanilgan elektr energiyasi uchun to`lovlar belgilangan tarifga nisbatan 1,5 baravar miqdorda o`svuchi koeffitsientni qo`llash orqali, eng kam yuklamali soatlarda esa (tungi payt - sutkaning qorong`i vaqti) belgilangan tarifga nisbatan 1,5 baravar miqdorda kamayuvchi koeffitsientni qo`llash orqali va yarim tig`iz paytda (sutkaning yorug` vaqti) o`rnatilgan tarif bo`yicha amalga oshirishi;

davlat organlari va muassasalarining bino va inshootlari, shuningdek, ko`p kvartirali uy-joy fondini loyihalashtirish, rekonstruktsiya qilish, qurish va foydalanishga topshirishda ularda energiya samarador va energiya tejamkor texnologiyalardan foydalanilganligi yuzasidan shaharsozlik normalari va qoidalariga muvofiqligi tekshirilishi;

yakka tartibdagi uy-joy qurilishidan tashqari, barcha bino va inshootlarni loyihalashtirish, rekonstruktsiya qilish va qurishda, issiq suv ta`minoti uchun sertifikatlangan quyosh suv isitgich qurilmalarini, shuningdek, energiya tejamkor lampalarni majburiy tartibda o`rnatish ko`zda tutilishi;

b.2) davlat organlari va tashkilotlari 2022 yil 1 yanvardan:

ularning balansida bo`lgan bino va inshootlarda issiq suv ta`minoti uchun faqat sertifikatlangan quyosh suv isitgich qurilmalari, shuningdek, mamlakatimizda ishlab chiqarilgan ichki yoritish energiya tejamkor lampalardan foydalanishi shartligi;

markazlashtirilgan issiq suv ta`minotidan uzib qo`yilishi;

v) «Energiya tejash milliy kompaniyasi» AJga:

v.1) O`zbekiston Respublikasi Uy-joy kommunal xizmat ko`rsatish vazirligi, «O`zbekenergo» AJ va boshqa idoralar bilan birgalikda uch oy muddatda davlat organlari va tashkilotlari bino va inshootlarida quyosh suv isitgich qurilmalari va mahalliyashtiriladigan mahsulotlar asosida mamlakatimizda ishlab chiqarilgan energiya tejamkor lampalarni o`rnatish bosqichlarini, shuningdek, mahalliyashtiriladigan mahsulotlar asosida issiqlik va elektr energiya iste`moli hajmini inobatga olgan holda mazkur mahsulotni aniq etkazib beruvchilarini belgilash bo`yicha takliflarni O`zbekiston Respublikasi Vazirlar Mahkamasiga kiritish;

Davlat organlari va tashkilotlariga ikki hafta muddatda quyosh suv isitgich qurilmalari va energiya tejamkor lampalarni joriy qilish holatlari, issiqlik va elektr energiyasi iste`moli hajmi, kadastr hujjatlarini ilova qilgan holda ular tomonidan egallab turilgan maydonlar o`lchami haqidagi texnik ma`lumotlarni va hududning muhandislik kommunikatsiyalari aks etgan rejasini «Energiya tejash milliy kompaniyasi» AJga taqdim etilishini ta`minlash;

v.2) «O`zbekenergo» AJga, «O`ztransgaz» AJga, boshqa manfaatdor vazirlik va idoralar, Qoraqalpog`iston Respublikasi Vazirlar Kengashi, viloyatlar va Toshkent shahar hokimliklari, issiqlik va elektr energiyasi, shuningdek, biogaz ishlab chiqarish bilan shug`ullanuvchi hususiy korxonalar bilan birgalikda uch oy muddatda:

issiqlik va elektr energiyasi, shuningdek, biogaz ishlab chiqarish va iste`molchilarga to`g`ridan-to`g`ri etkazib berish bilan shug`ullanuvchi korxonalar tomonidan «O`zbekenergo» AJning elektr tarmoqlari va «O`ztransgaz» AJning gaz taqsimlash tarmoqlaridan foydalanmagan holda issiqlik va elektr energiyasi hamda biogazni realizatsiya qilish tartibini ishlab chiqish;

issiqlik va elektr energiyasi, shuningdek, biogaz ishlab chiqarish bilan shug`ullanuvchi xususiy korxonalar tomonidan realizatsiya qilinadigan

issiqlik va elektr energiyasi hamda biogazga tijorat narxlarini belgilash bo'yicha takliflarni O'zbekiston Respublikasi Vazirlar Mahkamasiga kiritish topshirilganligi;

g) shaharsozlik normalari va qoidalari O'zbekiston Respublikasi Adliya vazirligida davlat ro'yxatidan o'tkazilishi, energiya samarador va energiya tejamkor texnologiyalarni qo'llash borasida esa «Energia tejash milliy kompaniyasi» AJ bilan ham majburiy tartibda kelishilishi shartligi, belgilanganligi;

d) O'zbekiston Respublikasi Davlat arxitektura va qurilish qo'mitasiga Adliya vazirligi, Moliya vazirligi, «Energia tejash milliy kompaniyasi» AJ hamda boshqa manfaatdor vazirlik va idoralar bilan birgalikda:

ikki oy muddatda bino va inshootlarni energetik auditdan o'tkazish, belgilangan shaharsozlik normalari va qoidalarga muvofiqlik pasportini yoki tegishli normalardan ortib ketganlik holatini bartaraf etish zarurligi to'g'risida xulosa berish, shuningdek, ularning energiya samaradorligi toifasini aniqlash tartibini ishlab chiqish va tasdiqlash uchun O'zbekiston Respublikasi Vazirlar Mahkamasiga kiritish;

2018 yil 1 martga qadar muddatda amaldagi shaharsozlik normalari va qoidalarni ularning qayta ko'rib chiqishi va davlat ro'yxatidan o'tkazilishini ta'minlagan holda tanqidiy o'rganib chiqish topshirilganligi;

e) O'zbekiston Respublikasi Iqtisodiyot vazirligiga «O'zeltexsanoat» AJ, «Energia tejash milliy kompaniyasi» AJ, «O'zbekenergo» AJ, Davlat soliq qo'mitasi, Savdo-sanoat palatasi hamda boshqa manfaatdor vazirlik va idoralar bilan birgalikda ikki oy muddatda energiya tejamkor lampalar ishlab chiqarilishining mahalliyashtirilishini kengaytirish hamda ularni turar va noturar joylarda bosqichma-bosqich joriy etish bo'yicha kompleks dastur loyhasini Vazirlar Mahkamasiga kiritish topshirilganligi;

j) O'zbekiston Respublikasi Uy-joy kommunal xizmat ko'rsatish vazirligiga Iqtisodiyot vazirligi, Moliya vazirligi, Davlat arxitektura va qurilish qo'mitasi, «Energia tejash milliy kompaniyasi» AJ, boshqa manfaatdor vazirlik va idoralar, shuningdek, Qoraqalpog'iston Respublikasi Vazirlar Kengashi, viloyatlar va Toshkent shahar hokimliklari bilan birgalikda 2018 yil 1 yanvarga qadar muddatda davlat organlari va muassasalarining bino hamda inshootlari, shuningdek, ko'p kvartirali uy-joy fondini energetik auditdan o'tkazish dasturi loyhasini Vazirlar Mahkamasiga kiritish topshirilganligi;

z) O'zbekiston Respublikasi Qishloq va suv xo'jaligi vazirligiga Qoraqalpog'iston Respublikasi Vazirlar Kengashi, viloyatlar hokimliklari, «O'zbekenergo» AJ va boshqa manfaatdor idoralar bilan birgalikda 2018 yil 1 fevralga qadar muddatda fermer xo'jaliklari va suv iste'molchilari uyushmalarining mavjud nasos stantsiyalarini ularning texnik holati, quvvati, balansda saqlovchisini aniqlash, fermer xo'jaliklari er uchastkalarida elektr energiyasi va suv sarfi samaradorligi nuqtai nazaridan, shuningdek, qishloq xo'jaligi mahsulotlari turlari va respublika tumanlari kesimida nasos stantsiyalari bilan sug'oriladigan er maydonlari, past samarali va energiya ko'p sarflaydigan nasoslarning mavjudligi, elektr energiyasini hisoblash uskunalari, qishloq xo'jaligi mahsulotlari ishlab chiqaruvchilari bilan shartnomalarning mavjudligini inventarizatsiyadan o'tkazish;

inventarizatsiya yakuniga ko'ra, O'zbekiston Respublikasi Moliya vazirligi hamda Qishloq va suv xo'jaligi vazirligi, «O'zbekenergo» AJ, Vazirlar Mahkamasi huzuridagi Qishloq xo'jaligi mahsulotlari davlat xaridi va qishloq xo'jaligini texnika bilan jihozlashni maqsadli moliyalashtirish jamg'armasi bilan birgalikda 2018 yil 1 martga qadar muddatda nasos stantsiyalaridan foydalanish bilan bog'liq ekspluatatsiya qiluvchi tashkilotlarni, moliyalashtirishning aniq manbalarini aniqlash bo'yicha takliflarni Vazirlar Mahkamasiga kiritish topshirilganligi;

i) «O'zbekenergo» AJga va «O'ztransgaz» AJga:

O'zbekiston Respublikasi Axborot texnologiyalari va kommunikatsiyalarini rivojlantirish vazirligi bilan birgalikda 2018 yil 1 iyulga qadar muddatda buxgalterlik, moliyaviy, ishlab chiqarish va boshqaruv hisobini avtomatlashtirish bo'yicha dasturiy komplekslarni o'z ichiga olgan boshqaruvning yagona axborot tizimini ishlab chiqish va idoraviy bo'ysunuvdagi korxonalarda joriy etish;

O'zbekiston Milliy teleradiokompaniyasi, O'zbekiston matbuot va axborot agentligi, Qoraqalpog'iston Respublikasi Vazirlar Kengashi, viloyatlar hamda Toshkent shahar hokimliklari bilan birgalikda mazkur qarorning mazmun-mohiyati ommaviy axborot vositalarida keng yoritilishini tashkil qilish topshirilganligi;

k) O'zbekiston Respublikasi Adliya vazirligiga boshqa manfaatdor vazirlik va idoralar bilan birgalikda bir oy muddatda qonun hujjatlariga ushbu qarordan kelib chiqadigan o'zgartish va qo'shimchalar to'g'risida Vazirlar Mahkamasiga takliflar kiritish topshirilganligi ma'lumot va ijro uchun qabul qilinsin.

3. «Qoraqalpog' hududiy elektr tarmoqlari korxonasi» AJ (Kerimzatov), «Qoraqalpog'iston gaz» filiali (Djalekeev) boshqa manfaatdor vazirlik va idoralar, shahar va tumanlar hokimliklari issiqlik va elektr energiyasi, shuningdek, biogaz ishlab chiqarish bilan shug'ullanuvchi xususiy korxonalar bilan birgalikda ikki oy muddatda:

issiqlik va elektr energiyasi, shuningdek, biogaz ishlab chiqarish va iste'molchilarga to'g'ridan-to'g'ri etkazib berish bilan shug'ullanuvchi korxonalar tomonidan «O'zbekenergo» AJning elektr tarmoqlari va «O'ztransgaz» AJning gaz taqsimlash tarmoqlaridan foydalanmagan holda issiqlik va elektr energiyasi hamda biogazni realizatsiya qilish;

issiqlik va elektr energiyasi, shuningdek, biogaz ishlab chiqarish bilan shug'ullanuvchi xususiy korxonalar tomonidan realizatsiya qilinadigan issiqlik va elektr energiyasi hamda biogazga tijorat narxlarini belgilash bo'yicha takliflarni «O'zbekenergo» AJ, «O'ztransgaz» AJ va Qoraqalpog'iston Respublikasi Vazirlar Kengashiga kiritinsinlar.

4. Qoraqalpog'iston Respublikasi Uy-joy kommunal xizmat ko'rsatish vazirligi (Seitov) Iqtisodiyot vazirligi (Tajetdinov), Moliya vazirligi (Ubaydullaev), Davlat arxitektura va qurilish qo'mitasi (embergenov) boshqa manfaatdor vazirlik va idoralar, shuningdek, shahar va tumanlar hokimliklari bilan birgalikda 2017 yil 20 dekabr qadar davlat organlari va muassasalarning bino hamda inshootlari, shuningdek, ko'p kvartirali uy-joy fondini energetik auditdan o'tkazish dasturi loyhasiga takliflarni O'zbekiston Respublikasi Uy-joy kommunal xizmat ko'rsatish vazirligiga va Qoraqalpog'iston Respublikasi Vazirlar Kengashiga kiritinsin.

5. Qoraqalpog'iston Respublikasi Qishloq va suv xo'jaligi vazirligi (Sultanov) tumanlar hokimliklari, «Qoraqalpog' hududiy elektr tarmoqlari korxonasi» AJ (Kerimzatov) va boshqa manfaatdor idoralar bilan birgalikda 2018 yil 25 yanvarga qadar fermer xo'jaliklari va suv iste'molchilari uyushmalarining mavjud nasos stantsiyalarini ularning texnik holati, quvvati, balansda saqlovchisini aniqlash, fermer xo'jaliklari er uchastkalarida elektr energiyasi va suv sarfi samaradorligi nuqtai nazardan, shuningdek, qishloq xo'jaligi mahsulotlari turlari va tumanlar kesimida nasos stantsiyalari bilan sug'oriladigan er maydonlari, past samarali va energiya ko'p sarflaydigan nasoslarning mavjudligi, elektr energiyasini hisoblash uskunalari, qishloq xo'jaligi mahsulotlari ishlab chiqaruvchilari bilan shartnomalarning mavjudligini inventarizatsiyadan o'tkazinsin.

Inventarizatsiya yakuniga ko`ra, 2018 yil 25 fevralga qadar muddatda nasos stantsiyalaridan foydalanish bilan bog`liq ekspluatatsiya qiluvchi tashkilotlarni, moliyalashtirishning aniq manbalarini aniqlash bo`yicha takliflarni O`zbekiston Respublikasi Qishloq va suv xo`jaligi vazirligiga va Qoraqalpog`iston Respublikasi Vazirlar Kengashiga kiritgin.

6. «Qoraqalpog` hududiy elektr tarmoqlari korxonasi» AJ (Kerimzatov) va «Qoraqalpog`iston gaz» filiali (Djalekeev):

O`zbekiston Respublikasi Axborot texnologiyalari va kommunikatsiyalarini rivojlantirish vazirligi Qoraqalpog`iston Respublikasi hududiy boshqarmasi bilan birgalikda 2018 yil 1 iyulga qadar muddatda buxgalterlik, moliyaviy, ishlab chiqarish va boshqaruv hisobini avtomatlashtirish bo`yicha dasturiy komplekslarni o`z ichiga olgan boshqaruvning yagona axborot tizimini ishlab chiqilishini ta`minlasin va o`z korxonalarida joriy etsin;

Qoraqalpog`iston teleradiokompaniyasi (Nag`metov), Qoraqalpog`iston Respublikasi Matbuot va axborot agentligi (Bekmurotov), shahar va tumanlar hokimliklari bilan birgalikda mazkur qarorning mazmun-mohiyatini ommaviy axborot vositalarida keng yoritilishini tashkil qilsin.

7. Mazkur qarorning ijrosini nazorat qilish Qoraqalpog`iston Respublikasi Vazirlar Kengashi Raisining o`rinbosari S.Nag`metov zimmasiga yuklansin.

Qoraqalpog`iston Respublikasi Vazirlar Kengashining Raisi

Q. Sariev

Ko'rib chiqildi:

- 
- 
- 

- [Vazirlar Kengashi](#)
- [Statistik va tahliliy ma'lumotlar](#)
- [Vazirliklar va idoralar](#)
- [Shahar va tuman hokimliklari](#)
- [Hujjatlar](#)
- [Respublika mehmonlariga](#)
- [Elektron hukumat](#)
- [Interaktiv davlat xizmatlar](#)